

АКАФИСТ В ПАМЯТЬ ВСЕОБЩЕГО ВОСКРЕСЕНИЯ И СТРАШНОГО СУДА

Кондак 1

Предвечный Царю веков, Творче и Господи, Судие Праведнейший и нелицеприятный, множество содеянных мною лютых помышляя, окаянный аз, трепещу Страшного Дня Суднаго, но, надеясь на милость неизреченнаго благоутробия Твоего, давидски молю Тя: по велицей Твоей милости прости мя недостойнаго, и не осуди мя по деянием моим, яко да благою совестью очищен, на всяк день и час Ангельскую песнь приношу Ти: Свят, Свят, Свят еси, Господи, Боже Вседержителю, Иже бе и сый и грядый, помилуй мя!

Икос 1

Архангельския трубы возгласение, на Суд Господень Страшный и Последний, живыя и мертвыя от всех конец земли собирающее, уже во ушесех предносится. Душе моя, душе моя, востани, что спиши? Конец приближается, и имаша смутитися. Воспрями убо, яко мало есть еще время на покаяние; бодрствуй, молися и трезвися и дела добрая твори, непрестанно вопиючи ко Владыце своему таковая: Свят еси, Господи, Боже наш, и Пресвят, и да святится и в сем грешном и во зле лежащем мире имя Твое, паче всякаго имене. Свят еси, Господи, Боже наш, да приидет Твое славное Царствие. Свят еси, Господи, Боже наш, да будет во всем воля Твоя святая на земли, якоже пребывает и на небеси. Свят еси, Господи, Боже наш, хлеб земный насущный дай нам, паче же небесный даждь ми на всяк день. Свят еси, Господи, Боже наш, остави ми согрешения моя, якоже и аз оставляю брату своему согрешения его. Свят еси, Господи, Боже наш, не введи мя в напасть, но избави мя от сетей лукаваго миродержителя тьмы века сего, ибо поистине опасно ходим и дние наша лукави суть. Свят, Свят, Свят еси, Господи, Боже Вседержителю, Иже бе и сый и грядый, помилуй мя!

Кондак 2

Вижду, Господи мой, Господи, яко вся знамения кончины века сего уже исполняются: вера святая в людех оскуде, беззакония умножишася, и любовь охладе; востают бо народ на народ, царство на царство, отец на сына и сын на отца, глады и трусы и пагубы изобилуют по местом, прельстители и предатели явишася, и гонения на верных Твоих воздвигошася, таже и проповедание Евангелия во свидетельство всем языком уже совершается, и скорбь великая посреди верных по вселенней распространяется, и по сих всех, разумя, яко близ есть кончина века сего, со страхом вопию Ти: Аллилуиа.

Икос 2

Разум неуразумный времени страшнаго и неизглаголаннаго пришествия Твоего открыти верным хотя, Всеблагий Господи, дал еси нам в подобие того притчу смоковницы, глаголя: егда бо ваия ея будут млади и листвие прозябнет, ведите, яко близ есть лето. Тако и вы, егда видите сия вся, — бодрствуйте, яко близ есть, при дверех. Тем же и мы, пришед на конец веков, со умилением зовем Ти: Свят еси, Господи, Боже наш, притчами тайноводя нас во Царствие Свое, да всяк имеяй уши духовныя слышати, да слышит, даруй и мне уразумение Твоего евангельскаго проповедания, да плотския похоти попраше, духовно жительствую и к жатве всемирной уготовляюся. Свят еси, Господи, Боже наш, притчею жерновною поучай нас, яко от двоих, вкупе труждающихся и живущих, в той день един поемлется и един оставляется, — не остави мене тогда со грешники, делающими беззаконие, но очищение даруй и введи во Твое славное Царствие. Свят еси, Господи, Боже наш, глаголяй: молитесь, да не будет бегство ваше в зиме или в субботу, о вѣце кончины мира, яко о зиме гадательствую; даждь ми, в сие осьмое тысячелетие живущему, стопы моя к бегству великому в сретение Твое уготовати и непрестанно помышляти грядущее помози ми. Свят еси, Господи, Боже наш, рекий: в чем застану, в том и сужду, — возбуди мя, множицею во грехи впадающа, к частому покаянию, да не обрящещи, пришед, мя неготоваго. Свят еси, Господи, Боже наш, Праведный и Милостивый, не вниди в суд с рабом Твоим, яко не оправдится пред Тобою всяк живой, — от лица же Твоего судьба моя изыдет. Свят еси, Господи, Боже наш, рекий: не всяк глаголяй Ми: Господи, Господи, внидет в Царствие Небесное, но творяй волю Отца Моего, — научи мя творити волю Твою. Свят, Свят, Свят еси, Господи, Боже Вседержителю, Иже бе и сый и грядый, помилуй мя!

Кондак 3

Силою Божества Твоего, Господи, воздвигл еси из гроба Лазаря, бездыханна четверодневна, и телеса усопших святых в час смерти и крестных страданий Твоих возставил еси; последи же и Сам тридневен воскресл еси от мертвых тою же силою Твоею. Веруем, яко грядет час и ныне уже есть, егда по гласу Твоему воскреснут мертвии, и востанут сущии во гробех, и изыдут сотворшии благая в воскрешение живота, а сотворшии злая в воскрешение суда. Не осуди тогда и мя, Владыко, по деянием моим, но помилуй со всеми в вере и надежде жизни вечныя усопшими, и пети не возбрани: Аллилуиа.

Икос 3

Имеяй ключи ада и смерти, аще и глаголал еси, Господи, верному рабу Твоему Иоанну тайновидцу, стоявшему посреде седми светильников: Аз есмь Первый и Последний, и живой, и бых мертв, и се жив есмь во веки веков, аминь, — повелел же еси ему написати имже подобает быти вскоре. Сия страшная и близкая скончания мира сего быти помышляя, не с суетным любопытством, но со страхом и трепетом взываю Ти: Свят еси, Господи, Боже

наш, Свидетелю верный, Первенец из мертвых, и Княже царей земных; любяй ны и омываяй ны от грех наших Кровию Своею, и ключи Царствия Небеснаго человеком вручивый, — укрепи мя в вере Твоей, да николиже отрекуся Тебе, но, аще понудитися, до крове постою за имя святое Твое. Свят еси, Господи, Боже наш, грядый на облацех небесных, да узрят Его всяко око и иже прободоша Его, и плачь сотворят о Нем тогда вся колена земная, — даруй и мне прежде дне того страшнаго плачь за грехи моя. Свят еси, Господи, Боже наш — Альфа и Омега, начало и конец, Первый и Последний — скажи ми кончину мою и число дней моих возвести ми. Свят еси, Господи, Боже наш, давай Откровение великому Иоанну, да уразумеем и мы, имже подобает быти вскоре. Того молитвами спаси мя в день великий гнева Твоего, егда ни горы, ни ущелья, ни камене возмогут укрыти грешники, бежашия от лица Твоего. Свят еси, Господи, Боже наш, апостолом Твоим Павлом поучай, яко аще имам пророчества и тайны вся и веру, якоже и горы преставляти, любве же не имам, кая ми польза есть? Дажь ми любовь нелицемерну, да тяготу брата моего, якоже и свою, понесу, и душу мою положу за други своя. Свят еси, Господи, Боже наш, Любы неизреченная, даруй ми возлюбити Тя, якоже иногда возлюбих грех свой, и принеся плоды покаяния, сподоби поработати Тебе, якоже поработах прежде сатане льстивому, да из глубины души воспою: Свят, Свят, Свят еси, Господи, Боже Вседержителю, Иже бе и сый и грядый, помилуй мя!

Кондак 4

Буря велия, разрушающая горы, предъидяще, трус и мрак, громы и молнии бываху, егда являлся Господь Илии в Хориве и Моисею на Синае; но сей страх малый есть прообраз последняго дне мира, о немже глаголаше Господь учеником на горе Елеонстей и Иоанну на Патмосе. Тогда бо вся вселенная сотрясется: и огонь, вода и вся стихии смятутся; и свет, и мрак, и кровь, и дым, и трубы Ангельския, и мертвецев востание и вопль людей соединятся, возвещая Второе пришествие и Страшный Суд Его, и час отмщения. О, ужаснаго зрелища и испытания! Невозможно есть нам и изобразити сие: горе — грешным, и слава — праведным тогда. Милосерде Господи! Спаси мя тогда, молюся, да пою Ти: Аллилуиа.

Икос 4

Слышах Тя, Господи, усты Петровы глаголюща: яко нынешняя небеса и нынешняя земля Словом Твоим содержимы и огню блюдомы на День Суда и погибели нечестивых человек, аз содрогаюся, но на неизреченное милосердие Твое дерзая, новаго небеси и новыя земли по неложному Твоему обетованию чаю, в них же вся правда живет. Сия убо желанныя земли жителя мя сотвори тогда, Спасе, зовуща: Свят еси, Господи, Боже наш, неизследимый и непременимый вчера и днесь, и во веки Той же еси, и лета Твоя не оскудеют; имей небеса и землю, яко ризу ветху сняти, в ризу нову и нетлену облещи

мя. Свят еси, Господи, Боже наш, стояй у двери и стучай, и к слышащему глас Твой, и двери сердца отверзающему — входящий к нему и свечеряющий с ним. Вниди в дом смиренных и грешных души моя и свечеряй со мною, якоже с Лукою и Клеопою, ибо преклонился уже есть день жизни моя. Свят еси, Господи, Боже наш, Путь, Истина и Живот мой, настави мя на путь Твой, и пойду во истине Твоей. Свят еси, Господи, Боже наш, рекий древле: Марфо, Марфо, печешися и молвиши о мнозе, едино же есть на потребу, — даждь и ми ни о едином земном пещися, но и о небесном помышляти. Свят еси, Господи, Боже наш, рекий богатому: безумне! В сию же ночь душу твою истяжут от Тебе, а еже уготовал еси кому будет? Помози ми сокровище не земное, а небесное собирать, идеже ни червь, ни тля тлит, ни татие подкапывают и крадут. Свят еси, Господи, Боже наш, освяти мя во всей полноте Своей, да всесовершен дух мой и душа и тело непорочно в пришествие Твое да сохраняются. Свят, Свят, Свят еси, Господи, Боже Вседержителю, Иже бе и сый и грядый, помилуй мя!

Кондак 5

Боже, Боже мой, пришедый взыскати и спасти погибшаго, — призри на скорбь души моя: век бо мой скончается, и Страшный Твой Престол предуготовляется, житие мое мимоидет, Суд же мне предлежит, грозя мне огненною мукою и пламенем неугасимым. Вонми, убо, молитве моей и не отрини слез моих, яко суетных: кто убо прииде к Тебе плача и не абие спасен бысть? Веру мою вместо дел вмени мне, Господи, и не взыщи дел, отнюдь оправдающих мя, яко тщуся творити тыя, но не имам их; но та вера моя да довлеет вместо всех, та да отвещает, та да оправдит, та да покажет мя причастника славы Твоя вечныя в невечернем дни Царствия Твоего, воспеваюша: Аллилуиа.

Икос 5

Провидя Даниил пророк, муж желаний, древле ясно Божественное Твое Второе пришествие, Владыко Господи, глагола: дондеже престолы поставишася, и Ветхий денми седе, одежды Его белы, аки снег, и власы главы Его, аки волна, чисты, и Престол Его пламень палящ; река огненная течет исходящи пред Ним; тысяща тысящ служажу Ему, и тмы тем предстояху Ему, на судищи сидящему, и книги отверзошася. Пощади убо, пощади, Спасе, тогда Твое создание, слезно вопиющее Ти таковая: Свят еси, Господи, Боже наш, на Престоле Славы почиваяй, Ему же дадеся власть и честь, и Царство, и вси людие; племена и языцы Тому работают; Его же власть — власть вечная, яже не преидет, и Царство Его не разсыплется. Свят еси, Господи, Боже наш, Великий и Страшный, Его же Даниил пророк святой виде, духом вострепета и смутися, — аз же, грешный, како дерзну узрети Тя и отвещати Тебе? Свят еси, Господи, Боже наш, Боже милости и щедрот и человеколюбия, — молитвами Пророка Твоего избави мя потока страшнаго реки огненной, хотя-

щаго поглотити мя за грехи моя. Свят еси, Господи, Боже наш, праведныя любяй и грешныя милуяй, горы мерилом разума поставивый, лик звездам исчитаяй и капли росныя ко ветров дыханию приложивый, — услыши стенание души моя, и вопль сердца моего к Тебе да придет. Свят еси, Господи, Боже наш, Сердцеведче, Ему же вся, не токмо словеса, но чувства и помышления содеянныя и несодеянныя наша ведомы суть, — не осуди мя по благодати Твоей за всякое слово праздное и помыслы скверныя, яже аз изрекох и помыслих в житии моем. Свят еси, Господи, Боже наш, продолжи ми век к покаянию и на посечение со смоковницею бесплодную не осуди мене. Свят, Свят, Свят еси, Господи, Боже Вседержителю, Иже бе и сый и грядый, помилуй мя!

Кондак 6

Проповедник Твой, Господи, духоносный Иоанн Богослов, видево

откровении славный Престол Небесный и под Престолом души убиенных за слово Божие, от великия скорби пришедших, иже и возопиша велегласно глаголюще: доколе, Владыко Святыи и Истинный, не осудиши и не отмстиши за кровь нашу живущим на земли? и даны быша коемуждо им ризы белы, и заповедано бысть им пождати еще время мало, дондеже скончуются соратницы их, подобно им имущия избиены быти, яко да восполнится предопределенное число. О, великаго и неизреченнаго долготерпения Твоего, Владыко! Яко и до сего дне отмщение нечестивым отлагаеши. Но горе миру, егда Судия внезапно приидет и коегождо деяния обнажатся, тогда погибнут грешницы от лица Божия, а праведницы возвеселятся и возрадуются пред Богом во веки зовуще Ему: Аллилуиа.

Икос 6

Возсиял еси на Фаворе, Христе Боже наш, и ученицы Твоя, елика вмещаху, славу Твою видеша; но и убояшася, и вострепеташа, и ниц падоша. С тою же неизреченною, но пребольшою всею славою приидеши на облацех в день он судити живых и мертвых, и явиши знамение великое, иже есть Крест Твой Честный, от конец земли и до конец небес простираяйся; егоже узревше, восплачут вся колена земная, ибо страх явления Лица Твоего земнородным страшнее по премногу есть всякаго в мире сем разрушения и пременения. Како срету Тя тогда, Боже мой, кий плач и ответ воздам Ти, не могый, бедный, вместити и иоты славы Твоея. Но на Твое несказанное милосердие уповая, всякий грех истинно кающагося побеждающее, дерзаю прежде конца возопити Ти: Свят еси, Господи, Боже наш, во свете живый неприступнем, — осени мя, грешнаго, светом Лица Твоего, и не опали огнем Божества Твоего, егда приидеши во Славе святей Своей. Свят еси, Господи, Боже наш, даяй знамения на небеси и на земли, посылаяй огонь, язву и глад на люди за множество беззаконий их, — сохрани мя от язв будущих и от чаши гнева Твоего

проклятия, приключится имущих в последний дни мира сего. Свят еси, Господи, Боже наш, Слове необыменный, даруй ми слово благо отвещати на Страшнем Суде Твоем. Свят еси, Господи, Боже наш, глаголяй: побеждая наследит вся, и буду Ему Бог, и той мне будет в сына, — помози мне греха победителем явиться. Свят еси, Господи, Боже наш, рекий: яко страшливых и неверных, скверных, убийц и блудодейц, идолослужителей и всех лживых часть в озере, горящем огнем и серою, ожидает, — спаси и избави мя от части тоя. Свят, Свят, Свят еси, Господи, Боже Вседержителю, Иже бе и сый и грядый, помилуй мя!

-

-

Кондак 7

Хотящу Ти, о, Преплагословенный Господи Иисусе Христе, Боже наш, в день пакибытия, во Второе пришествие, явиться миру на облацех яко Судии и Мздовоздаятелю, — о, каковый Страшный Суд будет тогда, Ангелом во тьмах и тысящах предстоящим, Апостолом председящим, человеком во ужасе вводимым, книгам разгибаемым и делом и помыслом истязуемым? Кий суд будет мне, зачатоу во гресех? Кто ми пламень, жгущий мя, угасит? Кто ми тьму просветит? Кто мя тогда защитит, аще не Ты Сам — Любы и Милость бесконечная! Молитвами Пречистыя Матери Твоея и Ангела- хранителя моего спаси мя тогда, зовуща: Аллилуиа.

Икос 7

Новое и последнее торжество явити сатане льстивому в мире попустивый, Владыко мой Господи, егда и пред кончиною века сего откроется человек беззакония, сын погибели, сиречь — антихрист, егоже пришествие со всякою силою и знаменами и чудесы ложными будет; иже, число звериное имеяй, совратит многия люди от пути праваго, и печать свою страшную на тыя положит, гонение на верныя великое воздвигнет и мерзость заустения на месте святе поставит, и три лета с половиною владычествовати будет, егоже и последи убиеша Духом уст Своих. О, горе мне, грешному, в день той тогда! Како спасение обрящу и отцу лжи противостану, когда избранных часть прельстится и праведник едва спасется? Но, о, Премилостиве! Аще и не понесох тяготы и зноя дневнаго, обаче с наемники единонадесятаго часа сопричти мя и веру крепку во дни искушений во мне утверди, да зову Ти такоя: Свят еси, Господи, Боже наш, по неизреченному промыслению Твоему попустити имеяй в последний дни воцаритися сыну гордому и погибельному, да верныя прославятся, неверныя же в конец посрамятся. Свят еси, Господи, Боже наш, два свидетеля тогда с небесе послати имеяй, да избранныя укрепят и антихристу окаянному противостанут, и истину Твою смертью своею засвидетельствуют. Свят еси, Господи, Боже наш, прежде всех предрекий нам

сия, быти подобающая, да зрим и не ужасаемся, и, избранных ради, сократи дни оныя хотяй. Свят еси, Господи, Боже наш, в терпении души нам стяжати заповедавый и до конца сия претерпевшему спасение обещаваый, — посли и мне дух кротости и терпения с упованием перенести напасти твоя. Свят еси, Господи, Боже наш, изми мя тогда от сетей лукавого века сего и печати антихристовы избави мя. Свят еси, Господи, Боже наш, сохрани мя в малом стаде Твоем, имже дати Царство благоволил еси. Свят, Свят, Свят еси, Господи, Боже Вседержителю, Иже бе и сый и грядый, помилуй мя!

Кондак 8

Страннаго и страшнаго Втораго Твоего, Господи, пришествия помышляя сретение, трепещу, прещения Твоего боюся и гнева Твоего. Егда приидиши грешныя мучити, праведныя же спасти, — плачу и рыдаю, день оный воспоминаю, и молю Тя прежде сего: Спасе мой, спаси мя! Да не прииду тогда в землю плача, да не вижду места тьмы, Христе Спасе мой! Ниже связан буду рукама и ногама вне чертога Твоего изверженный, одежду нетления имый оскверненную и не могый проглаголати, якоже глаголю Ти ныне: Аллилуиа.

Икос 8

Весь еси желание и сладость моя, Сладчайший Господи Иисусе, Упование всех концов земли. Поучаеши ныне о дне славнаго пришествия Твоего, глаголя: бдите и молитесь, не весте бо дне и часа, вонже Сын Человеческий приидет. Сие же ведите: яко аще ведал бы домовладыка, в кую стражу нощи тать приидет — бдел бых убо и не бы дал подкопати храма своего; сего ради и вы будите готови. Внимая убо сему словеси Твоему, благодарне взываю Ти: Свят еси, Господи, Боже наш, на всякое время и на всякий час бдети и ожидати дне великаго пришествия Твоего верным повелеваый. Свят еси, Господи, Боже наш, о дне том и часе никому не открывый: ни людем праведным, ниже Ангелом Своим. Но якоже молния исходит от восток и является до запад, тако пришествие Свое, имущее быти яве и внезапно, изобразивый. Свят еси, Господи, Боже наш, обновивый водою во дни Ноя мир, грехами растлевший, егда внезапно потопа люди нечестивыя, ныне же огнем попалити хотяй землю беззаконную с человеки неверными. Свят еси, Господи, Боже наш, правы пути Твоя и словеса Твоя истинны и непреложны и не мимо идут они, аще небо и земля прейдут. Свят еси, Господи, Боже наш, не даждь ми отягчити сердце мое объядением, пьянством и печальми житейскими, или иным непотребством, да не внезапно найдет на мя день той. Свят еси, Господи, Боже наш, рекий: яко на Святаго Духа хулившему не оставится ни в сем веце, ни в будущем, — соблюди мя не износити хулу ни словесную, ни мысленную на

имя Святое Твое. Свят, Свят, Свят еси, Господи, Боже Вседержителю, Иже бе и сый и грядый, помилуй мя!

Кондак 9

Все естество земных и преисподних ужасом многим содрогнется, и Силы Небесныя подвигнутся в той час, егда солнце померкнет, луна не даст света своего и звезды спадут с небес; небеса же с шумом мимо идут земли, пламенем горящей, и человеком, рыдающим, и ко Владыце всяческих, к Богу Страшному, со трепетом вопиющим: Аллилуиа.

Икос 9

Витии мира безумствуют, якоже и во дни Давида царя глаголюще: несть Бог, не видим Его! О, слепии! Почто не помышляете, яко неверием окамененнаго сердца своего себе огонь вечный готовите, и богоотступлением и прочими беззакониями кончину мира приближаете? Не слышасте ли из Писаний: яко невидимая Его от создания мира твореньми помышляема, видима суть: и присносущная сила Его и Божество. Очистите, убо, сердца своя и Бога узрите. Но пощади, Господи, от таковаго ожесточеннаго заблуждения и неверия ум, сердце и душу мою, да с верою, упованием и любовию образ пришествия Твоего всегда себе представляю и зову Ти: Свят еси, Господи, Боже наш, праведным судом Твоим всем нам в землю, от неяже взяты есмы, возвратитися повелевый и паки в день всеобщаго Воскресения из нея востати положивый. Свят еси, Господи, Боже наш, солнцу, луне и звездам некогда померкнути, а земли и всему, яже на ней, огнем преобразитися предопределивый, да вместо их явится небо ново и земля нова, в нихже правда живет. Свят еси, Господи, Боже наш, утаивый день, в оньже предстанут на суд вся племена и языцы, да восприимет кийждо по делом своим. Свят еси, Господи, Боже наш, Пастырю добрый и Судие Праведнейший, имеяй сести в день воздаяния Твоего на Престоле разсуждения, во еже разлучити же вся народы друг от друга, якоже пастырь разлучает овцы от козлищ; да поставиши овцы и уз одесную себе, а козлища ошуюю, и речеши праведным сладкий глас: приидите, благословеннии Отца Моего, и наследуйте Царствие, уготованное вам от сложения мира. Свят еси, Господи, Боже наш, от Него же нераскаянные грешницы услышат тогда со страхом: отъидите от Мене, проклятии, во огонь вечный, уготованный диаволу и аггелом его. Свят еси, Господи, Боже наш, обещающий Церковь Свою до конца мира непоколебиму соблюсти, во еже неодоленной быти ей от всех врат адовых. Свят, Свят, Свят еси, Господи, Боже Вседержителю, Иже бе и сый и грядый, помилуй мя!

Кондак 10

Спаси хотя древле Лота праведнаго от запаления с содомлянами нечестивыми, Владыко Господи, извел еси его вон из града и рекл еси рабу Своему Аврааму: яко аще бы и десять праведник имел град сей, не бы тогда погибл бысть, но оскудения ради святых в нем и мерзости грешных огню предается. Последи же и учеником Своим в притче плевел сельных глагола еси, яко плевелы и пшеница, обоя купно имут расти до жатвы, да никогда прежде жатвы восторгающе плевелы восторгнется купно с ними и пшеница. От сего убо и назидаемся: яко токмо праведники Твоими мир сей стоит доселе, и ради святых Твоих, в мире живущих, даеши еще время и мне, грешному, покаяться, сего ради, неизследиме Боже, благодарно вопию Ти: Аллилуиа.

Икос 10

Царю царей, Господи Спасе, Агнче непорочный, на Престоле Славы седяй, яко лев, от колена Иудова и корене Давидова возсиявый и мир победи-вый. Ты един достоин еси разгнати Книгу Жизни великую и разрешити печати ея! Ты, яко Агнец, закланный, достоин еси прияти силу, богатство и премудрость, крепость и честь, и славу, и благоволение — ихже воспевают Ти чины Ангельстии и дуси праведных на небеси. Сподоби убо и мя, недостойнаго, с ними славити Тя в день великий и в сей час звати тако: Свят еси, Господи, Боже наш, Содетелю и Промыслителю наш, сияй светом солнечным и одождяй на добрыя и злыя; наказуй и милуй, нарицай не сущая, яко сущая; низводяй даже до ада и паки возводяй. Свят еси, Господи, Боже наш, имеяй праведники просияти, яко солнце во Царствии Своем, — не погуби мя ради святых Твоих, но в Книзе Животней напиши мя и имя Твое начертай на челе моем. Свят еси, Господи, Боже наш, день весь жития моего совершен, свят, мирен и безгрешен даруй ми. Свят еси, Господи, Боже наш, Ангела мирна, верна наставника и хранителя души и тела моего на всяко время неотлучна последи ми. Свят еси, Господи, Боже наш, по благодати Твоей, изобильно на ны излианной, презри моя прегрешения и подаждь вся добрая и полезная души моей. Свят еси, Господи, Боже наш, прочее время живота моего сподоби мя в мире и покаянии скончати, ожидающу дне славнаго явления Твоего. Свят, Свят, Свят еси, Господи, Боже Вседержителю, Иже бе и сый и грядый, помилуй мя!

Кондак 11

Пение всеумиленное приношу Ти, Господи, Спасе и Содетелю мой, и молю Тя, егда приидеши судити миру всему на облацех, не постыди мя, студныя дела сотворшаго, и не погуби мя, якоже погубил еси Вавилон — великую блудницу, но, веры ради моя и любви к Тебе, жителя Сиона Горняго соделай мя, идеже есть глас и велий народа многаго, яко глас вод многих и яко глас грома крепкаго, глаголющих: Аллилуиа.

Икос 11

Светильник мой угасе, елея же благих дел, во еже возжеши той, несть ми; и где обрящуся окаянный, сном греховным отягченный, егда постигнет мя внезапно полунощь — час кончины моя, или Суд Божий, яко тать найдет на вся живущая на земли? Но да не услышу аз, якоже юродивыя девы, грозного гласа Жениха: не вем тя. Помози ми, о, Господи, наполни сосуды души моя елеем благих дел, паче же милосердия и смирения, и звати Ти: Свят еси, Господи, Боже наш, даждь ми послужити меньшей братии Твоей, якоже Самому Тебе: алчущии и жаждущии насытити, странная приютити, нагия одяети, больныя и в темницах страждущия посещати, да сподоблюся части десныя стояния на Суде Твоем. Свят еси, Господи, Боже наш, отыми от мене дух гордости, праздности и уныния бесовскаго и подаждь ми дух смиренномудрия, целомудрия, кротости и радости духовныя. Свят еси, Господи, Боже наш, вложи в мысль мою мудрость сына Сирахова: помнити последняя моя, дабы во веки не согрешити. Свят еси, Господи, Боже наш, Женише, красный добротою паче всех человек, грядый в полунощи, — с мудрыми девами в рай введи мя. Свят еси, Господи, Боже наш, прими мольбу о нас и предстательство всех святых Твоих паче же простирающую к Тебе всегда о нас руке Своя Деву Пречистую, Тебе рождшую. Свят еси, Господи, Боже наш, огради нас святыми Твоими Ангелы и отжени от нас духов злобы поднебесных. Свят, Свят, Свят еси, Господи, Боже Вседержителю, Иже бе и сый и грядый, помилуй мя!

Кондак 12

Благодать Твою, Господи Боже наш, грешныя милующую, сведуще, аще и недостойное житие явихом; обаче надежду Воскресения и жизни вечныя имуще, христианския кончины живота нашего, безболезнены, непостыдны, мирны. Божественных Тайн причастны, и добраго ответа на Страшнем Судищи Твоем всегда просим, во умилении зовуще: Аллилуиа.

Икос 12

Поюще Твое непостижимое о людех и о мире, Тобою сотворенном, промышление, Вседержителю Отче, Сыне и Душе, Господи наш, славлю Тя, создание и раб Твой, и, яко чадо Церкви Православныя, чаю Воскресения мертвых и жизни будущаго века; в вещь же настоящем молю Тя, Блаже: избави мя искушений, от мира, плоти и диавола находящих на мя, и укрепи в вере несумненней и любви к Тебе; да благочестне, чисто и свято прочее время живота проживу и сподоблюся части правыя в день пакибытия, зовуща Ти: Свят еси, Господи, Боже наш, Мздовоздаятелю Праведный, судити имей на велицем Престоле Своем, от Егоже Лица побегнут небо и земля, и место их не обретется. Свят еси, Господи, Боже наш, всем нам явитися пред Судище Твое

положивый, да воздаши коемуждо яже с телом содела: благая или злая; еже предопределил еси мне прежде дне того скончатися, — даждь ми безбедно прейти мытарства воздушныя бесовския и оправдатися на первом, частном, суде Твоем. Свят еси, Господи, Боже наш, сатану и аггелы его, зверя и лжепророка во езеро огненное на мучения вечныя Архангелом Твоим Михаилом ввергнути имей; того предстательством избави мя муки страшныя, тартара и тьмы кромешныя и геенны огненныя, идеже червь не умирает и огонь не угасает. Свят еси, Господи, Боже наш, всех Твоих ради святых, изряднее же святых Твоих щедрот и Крове Твоея, за ны пролиянныя, жителя мя сотвори Иерусалима Небеснаго, идеже несть ни смерти, ни плача, ни вопля, ни болезни, ни скверны некия, но жизнь безконечная, и слава Твоя присно осеняет его. Свят еси, Господи, Боже наш, прежде сих всех помози ми соблюдати словеса евангельския, творити волю Твою и прилежно внимати пророчеству Откровения Иоаннова, яко время близ есть. Свят еси, Господи, Боже наш, рекий в конец Богослову: яко, дондеже суд приидет, скверный — да сквернится еще, а святой — да святится еще. Ей, гряди скоро, и мзда Моя со Мною есть. Аминь! Ей, гряди, Господи Иисусе, молит Тя Церковь Твоя, зовущи: Свят, Свят, Свят еси, Господи, Боже Вседержителю, Иже бе и сый и грядый, помилуй мя!

Кондак 13

О Великий и Непостижимый Боже! Альфа и Омега, начало и конец всему сущему, Иже вчера, днешь и во веки Той же, и у Него же несть пременения, погоже и лета не оскудеют. Приими сие малое акафистное моление мое в память грядущаго и Страшнаго Суда Твоего, всегда мною Тебе приносимое, и, по множеству щедрот Твоих, очисти беззакония моя, и имя мое в Книзе Живота напиши, и в юдоль плача не осуди, егда судити сядеши; и от пресветлаго лица Твоего не отлучи мене. Да егда скончаются дни века сего, и небеса и земля сия мимо иду, и светила, яко воск истаят, тогда, о, Всемилоitive, да узрю и аз стены Горняго Иерусалима, и купно со избранными десными Твоими овцами вниду во святой град сей и тамо насыщуся славы Твоея и буду пети Ти песнь нову во вся веки веков: Аллилуиа.

Этот кондак читается трижды, затем икос 1 и кондак 1